

摘藻堂四庫全書薈要

集部

欽定四庫全書薈要

集部

誠齋集卷二百八

七

詳校官助教臣謝登雋



欽定四庫全書管要卷一萬五千六百八十四

集部

誠齋集卷一百七

宋 楊萬里 撰

尺牘

答贛州彭郎中

某伏以小至將臨清霜寒霽即日恭惟判府郎中尊契
丈暮年報政惠化川流民咏天相台候動止萬福玉倦
受祉山則某老日益侵病日益加閒冷之蹟姓名不敢

自達於通貴之前四方人事皆已掃影今茲陽復令辰
君子道長有如台座心所起敬亦不克奏記為踐長之
賀蓋昇沉異勢其理然也不謂台慈折節岳牧之尊篤
契韋布之舊遣騎損誨訪問生死鈴齋名酒分餉埜夫
以暖其長鑱斲黃獨之寒以勞其散薪煑白石之苦攝
衣下拜黍谷春生中心藏之多言何謝一衣帶水無從
伏謁金玉是身筆索就列日夜惟此之禱

答廬陵劉縣丞

某伏奉誨帖以小春絕品分侶楚人烹玉麈試春色心
知韻舌知腴第恐春風不慣腐儒湯餅腸耳一笑占謝
不既悚仄悚仄

與湖南運使陳郎中

某伏以小春良辰新寒氣肅即日恭惟都運直閣郎中
玉節倚天忠誠貫日百城蒙惠三神字體台候動止萬
福某敬拜手奏記徹姓名於槩人仰惟財幸

某也愚不肖願獨有落落心事吐之則誰聽不吐則不

釋開卷闔且想千載若相期茲非退之之詩乎士或日
接膝而不相知或異世而相慕茲非退之之語乎某之
與執事同生於今而謂之異世謂之千載可乎不可也
緊執事以又玄之學不世之文一戰文闡萬人奪氣有
司驚目收異科策高足偃名藩剋望郎陞延閣持英箚
豈弟于州忠慨于朝風采于一路厥今談者言當世之
名勝必曰陳公焉某老病之身不中世用棄官八年請
老四祀襜褕乎西疇之烟雨簞箸乎南澗之水月獨不

得與嶽麓之猿鶴橘洲之鷗鷺一望執事之聲光以某
之想慕知退之之想慕想而不見慕而不釋不於執事
乎吐之將於何吐之尺一旦下紅藥紫薇疇公之歸自
此愈遠矣臨風慨然

某惶恐再拜敬問台閔玉嫺即日恭惟尊尊幼幼受祉
山則有廬陵委願奉教條某惶恐白事中男承務郎衡
州安仁監稅務次公筮仕云初百事牆面孤寒伶俜之
跡所望於上官收卹其尺寸而脫略其罪戾昧其始而

全其終百穀之仰膏雨履屋之蒙震風舍執事疇依者
與衡州陸知府

某伏以良月行冬初寒以雨即辰恭惟判府太中鎮撫
大維歸若天柱民謳豈弟天迪忠嘉台候動止萬福某
謹眊飾不腆之書自徹於涓人謁者之伍仰惟財幸

某竊嘗洞視今古大夫之家有能擅勲名之場沂儒學
之源登文章之錄世濟其美嬋媽相踵有陸氏若者乎
無也若遜抗在吳若機雲在晉若德明敬輿在唐皆人

中龍也孰謂古有其人而今未有乎執事英妙之年拔
竒收科玉映潢臺德明之儒學機雲之文章蓋魯國之
寶玉大弓黃梅之夜半衣鉢皆家傳之自得而不問外
人者也遜抗敬輿之勲名天下方有望焉衡山之雲綠
淨之波豈真能竒留者一州之福將均宏之於天下公
卿闕而選所表寵渥徵黃誕寘禁近其不遐矣某也山
林楚人已抽手板付丞相矣安得一覲當世之勝流以
一洗其胸中之悃跋乎敬賦草蟲之三章以寄此心

某惶恐再拜僭越敬問台閔玉嫔即日恭惟尊尊幼幼
受社山則廬陵有可效老聃之役者唯命是聽某惶恐
白事中男次公筮仕有俶百事牆面今官衡之安仁監
稅正隸大府之下邑遂得仰事高牙大蠶之光塵充太
史之牛馬走豈無涓埃收之郵之豈無罪戾燾之免之
不勝舐犢之情不敢自蔽而瀆聞於大君子之聽不勝
主臣

答權桂陽軍斛通判

某伏以良月行冬初寒帶雨即日恭惟權府府判太中
設監最課假守兼官二境宜民三神隕祉台候動止萬
福某敬上記以謝書禮報况一再之辱未見君子願言
珍重立竢春風玉筍之除

某屬者專走家僮脩敬樹門之隸人迺承諸臺遴賢兼
刺鄰府春仁秋威洽於二邦在彼願其為真在此願其
終惠疊是最狀於以上聞外陟使華裏翔郎署在此行
矣其中男次公效官有倣百事牆面適有天幸得我鄉

先生而祿賴焉未趨府庭而薦口已徹於五馬至於假材官而六之使不徒行以抵官下不貲之恩盡室永懷東坡與王定國書云我兒即公兒也敢一請再請不一請而已也惟終惠之

與湖南黃提舉

某伏以維孟之冬亦小之春即日恭惟提舉太中一節星臨百城霜凜民氣嘉樂神天給扶台候動止萬福某敬齋心奏記司鉛槧者仰惟財幸

某恭聞皇上顧憂元元逖在湖山之外其欲安安如在畿甸之內於是疇咨宰臣涓選膚使如西周皇華之五章如東京臨遣之八人者惟提舉太中以豫章棟榦之材商瑚夏璉之器繁星五緯之望百千人中裒然舉首仁風先春義氣後秋鸞舞歌姦貪瑟縮何其盛也何其盛也使事有指顧此耿中丞之一職豈鬱鬱久居者鷄翹豹尾之間尚多虛位非執事是待而誰待也某棄官八年請老四祀孤雲笠鶴之與倚桃花流水之為

釣仰名流之芳風瞻使星之末光可思而不可忘可望而不可見寸心耿耿安得傾豁抑許穆夫人之詩不云乎百爾所思不如我所之引領南雲悃悃款款

某惶恐再拜敬問台閔玉婍即日恭惟尊尊幼幼受祉無央有廬陵委命戒唯唯某惶恐白事中男承務郎監安仁縣稅務次公筮仕云初百事牆面今以蚍蜉蟻子之微而仰事動搖山嶽之威是震是栗敢九頓首以請儻或辱許效其十駕而徧覆之以二天使得竊五斗以

活其孥仁人不報之恩寒士不貲之福緊門下是怙

與湖南陸提刑

某伏以即辰大冬初寒小春猶燠恭惟提刑太中出節
少府訓夏祥刑百城觀風三神錫羨台候動止萬福某
竊惟祥刑使者千古未聞蓋肇自章聖皇帝咸平四年
閏五月始有開封斷獄覆奏之詔七月始有諸路並置
提點刑獄官之詔於是殿中丞李湘首膺荆湖南路之
選聖聖繼繼此職增重於部使者之中命曰職司今提

刑太中一代人物之英三朝德業之望偃藩持節聲光
蔚然斗柄垂天慶雲拂日何以尚之結絲而侍禁廷聽
履而上星辰人猶遲之而原隰載驅於彼丞相將非今
聖上欽恤亦如選李湘之意耶使事有指綉衣眷當霄
漢立某方賡少陵此詩以賀班公登仙之行也某老病
楚人棄官八年請老四載講聞嶽峻川流之盛名而獨
無路以望見其末光一生遺恨孰弘於此寄聲脩好吁
已後矣仰惟高明洞視心曲云

某皇恐再拜敬問台閔玉婣即日恭惟尊穉蒙福姪兆
有廬陵之役敬請指縱某皇恐白事中男承務郎監衡
州安仁稅務次公筮仕云初百事牆面天假之幸迺遇
今日之陸先生修收孤寒而主後進如退之所作行難
之篇者寬其鞭箠而宥其簡書使得餉於是以餉其
口此非人皆有之天此真我獨有之天也嚮風歸依有
萬其望

安仁涂知縣

某伏以即日良月初寒恭惟判縣中大佳政宜民自天
孚佑台候動止萬福某謹上記下隸伏惟財幸

某幸奉瑤林瓊樹之輝光歲月湍奔至於照人風度可
思而不可忘者了了在目翼翼在心旦晝往來於懷也
執事之才之劭大其施則宜遙鷓鷯之行小而却亦合
當麾節之寄顧尚淹邱於鳴琴製錦之地何也然學道
愛人之聲與湘水俱流下轉上聞自密縣而超拜何知
非福其中男次公筮仕之始百事牆面迺得事其大夫

之賢者豈非幸歟惟故人高誼必有以訓其所未能而
葆其所不逮者使得餽於是而璧之或全舍執事何適
矣

送俞憲羊麪

某伏自道塗相傳玉節光華將照臨先人之敝廬日掃
花徑以俟東來之紫氣惟是荒村去城差遠山厨土銜
索然不給於鮮遣人賒市喚婦自饌豈不夙夜然高牙
虛徐而日昃食乾矣一易再易則亦如之頃伺之久倉

猝之頃不免效荷蓀之殺鷄羅氏之烝鴨溪毛墊藪此固不足以羞於王公者不腆乘壺羊腔麩碩敢贅諸行廚惟洞視其禮不足而敬有餘不殺而揮之有萬其幸

答趙戶彥洪

某伏承遣騎墜教殊慰孤寂四六妙絕切磋彌瑩後又過前老夫當避路矣可珍可妬兩絕句次之似非得意之作也它日進一步則自知之加餐飯長相思玉帝除書定應不遲

答周丞相

某下稷吹燈發函奉告覺銀鈎灼煥天氣盡白驚喜絕
倒命戒程丈銘詩歡以敬承已留玉當少須矣辱相國
有盡子詩寫來之教春前偶醉餘竊語憶秦娥小詞云
新春早春前十日春歸了春歸了落梅如雪堊桃紅小
老夫不管春催老只圖爛醉花前倒花前倒兒扶歸去
醒來窓曉仰供仲尼之莞爾不勝主臣

答韓提舉華文賀年

某伏以獻歲有做好雪知時即日恭惟某官玉節倚天
霜臺拂日三神盡護台候動止萬福某老病退休木茹
沙眠貧而安病而不疚者部刺史之天我獨有二也茲
焉恭審六條允察千倉既盈威惠川行鰥寡春熙帝疇
顯庸恩錫書贊進直舜典濬文之閭式增周誥禮樂之
華恭惟驩慶自此月昇金掌春度玉墀某也幸拭目以
觀盛事

答程監簿

某伏以春意澄穆即日恭惟監簿契丈大孝哀疚深切
天相至性孝履支福某臥痾山墊庇焉以免未占良覲
願言以禮制情趾美續聞恪遵聖人哀毀之戒此朋友
所望也

某山居苦無端便小疎問訊獨有景行之勤廝示剝啄
誨帖下逮驚喜不勝命戒先丈閣學銘詩某受知不淺
其何敢辭自視欲然其如固陋恐菲文不足傳遠耳今
月十五日夜拜領行狀明日撰成又明日刊落其甚繆

者又明日脫藁又明日送似益公求正是併為求題蓋
臂痛不能多寫凡四日乃書丹畢不知襄事之日此文
到否蓋行狀逼期乃至非敢作魯人之舉也如莆田陳
丞相葉丞相皆前期一年送行狀來庶得小從容文字
較子細耳仰惟幸察

答醴陵錢知縣

某間者濶焉久不聞問每一動心向風永懷便如對面
語也遣騎墜言驩喜以量即辰春事過中寒暄之雜恭

惟文季知縣中大契兄學道愛人民咏天棊台候動止
萬福玉嫵均慶寄似新詩朗咏三反五復發清新於平
澹之中藏古雅於追琢之外非時世折揚黃華之音也
第如俗學多翻變晚輩論時學等語不宜筆之於書何
苦以毒口牙招齒舌乎每以此戒朱元晦今復奉諭古
來得道人挂舌屋壁間此真吾師也願言自愛以竢馮

招

賀吉水秦宰交割

某伏自牙檣西上紫氣東來日偵先驅令兒輩駿奔迓
迓久之寂然竟辱旆旌屈臨環堵如之何其感又如之
何其愧也違離屬爾尊仰如新即辰春事過中寒暄相
半恭惟美錦初製民咏天棊台候動止萬福玉嫵均慶
某恭審涓選今日佩服印章教條一新穉耄呼舞恭惟
驩慶某屬以老病不克從大夫之後修桑梓之恭專令
大兒謁賀伏幸台察

答新封州譚知府

某頃辱屈使君之千騎臨玉川之數間呼酒嘯歌秉燭

軟語老病之軀頓有生意別去未幾復增永懷尺書寵

詒殊慙耿耿即辰暮春積雨恭惟明仲判府太中鄉丈

為裝入覲神天送喜台候動止萬福恭審日邊除書即

家而拜下轉中和之政上結聖明之知不出以南坐致

通顯閱貢禹之同載多甘茂之一官才解二千石之章

即佩見大人之組恭惟驩慶某伏自壬子棄官丙辰乞

骸四年三請一奉不允之詔一不報今請乃蒙恩增秩

一階進職四等非平時揄揚何以拜此方且辭免職名
未敢推謝餘惟珍重即立春風玉笋之班

與朱侍講

某伏以四月維夏南風之薰即日恭惟侍講殿撰尊契
丈燕處超然天棊履祥台候動止萬福某老病日侵祇
有不如顧棄官八年乞骸三請待命四載前月四日乃
始蒙恩放牛桃林俾聽橫笛惟是增秩進職踰分絕等
方且辭免自非平素借重何以拜此伏自去秋得一書

於曾無疑許既而遇甘道士往五夫因之修報不作石
頭事否近得城中親舊書云契丈露章告老而適當新
舊尹去來倥偬之間幕府文書不免魯人之臯遂致相
誤且無疑來訪具談其詳相與太息天下之事固有蹉
跌如此者莫之致而至者命也浮雲去來想能安之無
待於開譬也足疾今年不至良苦否吾曹老矣能復閱
幾寒暑少年狡獪著書罪過願痛掃除退之云書於吾
何有此外無可相規者餘惟珍重永綏眉壽

與丞相

某僭敝二詩仰獻一莞不敢奏記懼勤報章而山僮言
歸銜袖彪列蓋天落雲錦之書華星秋月之字金聲玉
振之詞也盈尺之紙萬寶是叢肅然盟手而披文頓覺
沈疴之去體銜戢何謝藏去為榮仰惟鈞慈下燭悃悃
孩兆其幸

某移病棄官今已八年三章乞骸四載竢命近蒙聖恩
解縱歸田而增秩一階進職四等控免弗俞閔免下拜

重念某孤陋之蹟奮自諸生效官於中外者四十六寒暑矣乃今得以保全幸無玷缺不辱先人之教茲蓋我丞相以天下之大宗師長育吾鄙之小子挈攜造化不遺餘力遂濟登茲感恩戴仁無以表見敬哦小啟別紙申呈仰惟鈞察

答周丞相

某疇昔之朝方被控免弗俞之命登時下拜賀書際晚走兵人奏記并短啟以謝造化之恩當既徹聞矣今日

下稷上介戾止法書賁之雲箋郁紛玉句鏗夏墨池家
傳之故事援據罔遺黃公酒壚之戲言收拾為雅荷聖
恩之非淺入鴻筆而彌榮推謝不莊悚感無數仰惟鈞
察

答周提舉

某疇昔之辰方被控免弗俞之命登時下拜即具短啟
推謝我乘成老先生蓋引年致為臣之風曠不見聞於
昭代久矣惟公家伯仲首倡遐舉以媿貪夫如某之淺

陋豈不懷祿耽寵仰慚二大老之高節故欣慕踊躍以
自附其末光所謂魯無君子者歟而遣騎詒書華以箋
啟英詞絢練逸韵清鏘至於履危機居憂患與夫杜陶
汲賈韓孔歐蘇等詩某何人乃敢承語此此殆詞人逸
筆不能自制輒借某以裝鋪席者耶緹衣十襲拂除蛛
塵永以為寶耳推謝不莊主臣主臣

某伏奉別紙諷及花事老圃舊有蘇花四百株丁巳秋
曠枯及其半豈敢望萬象臺上春光姦兆之秋毫也耶

邢尹不可相見必有能辨之者一笑

答聶倅

某伏以高軒偉然一新風月之壯觀蕪詞陋矣不啻巴
渝之俚音既浣翠珉之鑱鐫復點華綺之藻藉賜以墨
本覽之頽顏推謝不莊誦言靡已仰惟台察

答張尚書

某伏以即日暑風清微恭惟詳定判部尚書尊契丈八
座穹崇名位兩隆天監孤忠台候動止萬福某頃嬰清

漳之疾偶拋彭澤之米荆扉深閉今已八年丙辰古稀
之齒上章乞骸前後三奏俟命四載乃今始蒙聖恩
放歸田里惟是增秩一階進職四等此禮特異控辭弗
獲俯僂下拜不勝震慙自非天上知己吹送之力何以
逮此懷感何數自顧襁褓在躬夫須蓋頭竊自薄陋不
敢貢尺書以謝齊閣不謂屈尊念舊忽拜天落雲錦之
書訪問生死侑之以天雄附子北果之珍餉拜嘉驚喜
亟覩亟拜此事今無古或聞也唐律一首小見謝幅一

覽亦可知別後筆力之退自此吾弗敬子矣荷荷雲泥
益隔伏謁何階願言珍重即看趾美祖烈邁跡韋平用
光吾道

答胡季亨

某辭奉談間居諸易久妙帖下逮長牋偕來明月連城
驟驚滿把落英墜露頓覺回春某三章乞骸四載俟命
蒙恩從欲謝事歸田顧推謝之未能忽慶語之先辱敘
報不恪伏惟財幸

答臨江王守

某伏以即日維孟之秋殘暑未退恭惟判府太中尊契
丈惠化告成民歌天棐台候動止萬福玉嫵咸慶某老
病坐踈安訊而金玉之音紹至矣清江使君百餘年間
豈無一聞人而三孔之文未傳非闕歟今旁搜放失遂
成一書舉一推萬其政無遺典矣分似名山之副至惠
至感墊人孤陋不足以鈎君子之深者然植之以豈弟
之根莠而茂之以平理之枝葉則塗之人異輔頰而同

謳吟也賈子所謂類非俗吏所能為者非歟然某猶竊
有恨安得結輩十數公參錯天下為邦伯使萬物吐氣
吾與少陵蓋異世而同恨也相去尺有咫無從參拜北
眸悁然願言貴珍即膺公卿表選之制大兒昧學仰辱
異知盡室榮之又恐立霄漢之日貴人多忘耳荷荷

答市舶葉提舉

某伏以維孟之秋殘暑未退即日恭惟景伯提舉太中
僚契丈使事整暇有相自天台候動止萬福某老病日

侵自丙辰以後三章乞骸四年俟命適者方蒙受聖恩
察其懇切放歸田野而增秩進職異數優隆控辭弗獲
閔免僂受震思靡寧未皇推謝先枉慶緘契丈把麾持
節已徧外庸盍歸春風玉笋之班以宏其施垂天之翼
尚小留滯周南何也先丞相銘詩屬之益國真今之無
價手也甚善甚賀雅意或欲持江介之節此老夫之福
也里諺云老人如小兒得人矜憐而溫存之乃其願欲
者荷荷願言珍重以膺新渥

某再拜僭問契家台媿即日恭惟尊尊幼幼受祉山則
今似長育計今應就傳從學久矣想一日千里也遠餉
通應異味絕交經歲矣鯨尤耐久山村客至便可供一
杯也珍感珍感有委不外

答趙運使

某伏以時雨滌暑老火作仇即日恭惟都運敷文年文
宮使奉瑄祝釐天迪燕喜台候動止萬福某入秋感暘
遂作瘧疾平生故人黃昏為期彊半舍去獨此謝謝水

魂與僕作緣雙日暫別隻日必至殊不爽約今日當見
臨危冠焚香方徙倚以俟之而年丈語離之書如天落
雲錦泚手披讀此疾忽脫然去體古人草檄可愈頭風
僕始不信乃今知之甚榮甚惠凡今之交其合若萍其
散若煙有如吾年丈之有情若斯者乎無也偉材達學
何必減不土之里無言之詩著侍臣冠而立玉階方寸
地自是國之光輝外庸已枉其人矣而又遽聽其去可
為時歎不為年丈惜也寓直寶儲上意可占又有大者

乎願毋疾其驅以竢詔追

答傅尚書

某伏以時雨致爽秋陽作彊恭惟判府華學尚書尊契
丈岳牧詞人民之父母三神隕祉台候動止萬福某伏
自壬子之秋移病免歸山林莖人姓名不入脩門書問
不至朝貴至於平生知己如台座者亦復作疎非意也
勢也微高朗洞視其何實非罪丙辰以還三章乞骸四
載俟命邇者始蒙聖恩察其悃悃放歸田里而增秩進

職異數優隆控免弗俞僂受震虢揆厥所元噓枯所逮
道遠莫謝而一介行李剝啄荆扉把一封書天落雲錦
慶語玉潔故情春熙脫略雲泥相望之懸彌堅金石素
交之誼今人有無此事固不論也求之古人有是否乎
未可知也其榮其荷宜如何也台座人望在今所謂水
之江漢星之斗者廟堂虛位上宜置諸左下猶舉疑丞
而宅之武夸山川似不得苛留此一朶垂天之雲也願
言貴珍以須書贊之汗渙

某再拜僭問契家台媿恭惟尊尊幼幼受祉山則大兒
荷不鄙下問何榮如焉敬拜謝意未敢奏記不專故也
遠餉新茶所謂元豐至今人未識者老夫是已敢不重
拜當自攜大瓢走汲溪泉東澗底之散薪燃折脚之石
鼎烹玉塵啜雲乳以享天上故人之意媿無胸中之書
傳但一味攪破菜園耳荷荷

答戴左伯知縣

某伏以秋雨進涼即日恭惟知縣朝議僚友學道愛人

奉法循理民謳天堦台候動止萬福某敬脩辭以謝先

辱伏惟財幸某沈痼自屏親者掉臂而過疎者白眼以
覲惟吾故人金石不移松柏後凋年歲錄續遣騎詒書
訪其生死於黃犢之草中白鷗之沙上彌久而益堅不
懈而愈劬一何與人異嗜好之酸醎如此哉某自士子
棄官丙辰請老連牘三請俟命四年近蒙聖恩放歸田
里惟茲異數優隆力控弗俞僂受震甑皆故人平素吹
送之助也佳政宜民下轉上聞借令未至如卓今之入

宅公府小却猶應察廉烏臺含香粉署所謂家貧望鄰
富也荷荷

某再拜上問契家台媿伏惟尊穉咸慶賀箋妙絕久不
聞韶感喜無斁小啟稱謝却成以瓜報瓊也寄似紫花
朮石乳香拜受寶之珍之此正扶老所須者故人之意
厚矣感感

答余丞相

某伏以即辰風生桂枝露下金莖恭惟觀使大觀文左

丞相珍臺臯伊平地松喬剛畝愛君江海存闕三神顯
相隕祉發祥鈞候動止萬福恩閔相媿尊尊幼幼純嘏
山則東閣郎君伯仲直閣叔季出處皆足慰意某餘生
奄奄本之以支離疏之形骸申之以遺積痼之沈痼歲
在丙辰幸及未先犬馬填溝壑之須臾自列上聞勾歸
田里一奉不可之詔一蒙諸公問寢其事答以官簿之
年未至三表乃荷聖恩放牛聽笛縱鶴出籠此已徵福
不貲矣而又增秩四品進職四等以榮其歸而華其老

以鏡湖老監而初豈夢到甘泉法從之綴乎深惟聖
主所以幸老臣者而誰實白發其端乎揆厥所元不在
門下而奚在遠未克謝而濟翁弟於七月二十三日轉
致答教乃四月某日筆也披讀有衛武公鄭子真之褒
有垂安車策鳩杖之賀某何人敢竊仲尼一字之褒乎
感恩在心言之淺也竊審泰階之光尚寓躔次於贊公
之房人以為陋我以為華所謂無地起樓臺相公者何
處覓庾冰庾冰正在此一笑親戚吳推璪遂蒙若宵少

僕敢不他時備數之諾某敬代吳下拜以謝恩言矣來
年既盡則辛酉上半年文字正渠書考第三之日何晚
之有小兒幼輿入京換授此又我公之恩也今詣翹材
以謝焉此外不勝大願愛金玉之身即著袞繡以歸濟
翁掌故舉族洋溢乎恩波中矣

答林提點

某伏以顛陽過中龐涼彌厲即辰恭惟都大提點寺丞
玉節行部使星還次高厚孚休台候動止萬福某老病

餘生懸車曲肱兩耳掩豆乃不聞知拂天之旆照臨鄉
邦曾不得隨父老扶杖縣令負弩之後以遮見右轅之
清塵不敏之辜雅宜笞罵而一介行李盈尺錦書惠然
飛墮楚廬之荆扉慙慙暄涼訪問生死黃冠草履之人
何以辱此於部使者攝衣端拜盥手朗誦如獲寶玉大
弓舒鼎昭兆不翅也非有胸無心疇不懷者占詞推謝
萬此寧足願言愛金玉之身貯筆橐之拜心禱髦髦

與張寺丞

某伏以即日千崖秋高恭惟功父寺丞詩兄大隱隱朝
自天墮社台候動止萬福某老病餘生人事盡廢書問
不入帝城平生故人有厚於吾功父者乎無也亦復作
踈可不可也寸心孤往惟夜夢多見之耳吾曹抽手板
付丞相良一細事某乃四年三請而後得之士大夫以
濟攀分寸而上為難不知乞身謝事其夏夏乃爾功父
所挾者古而所售者今所賞者稀而所偁者衆十里九
山一武再止想前知其然而怡然不怪也觴豆湖山蕭

勺風月優哉游哉聊以卒歲肯遽以此而易彼乎小兒
幼輿入京換授敬令一見東坡與王定國書云我兒即
公兒也惟面命而耳提是所望者願言珍重當有夜誦
子虛者

與徽州任知府

某伏以即辰秋光晚晚顥氣高潔恭惟判府寺丞契丈
露冕惟新建牙伊煥耄倪呼舞神天成釐台候動止萬
福契家玉嫫受祉山則某老病餘生伏自壬子棄官丙

辰乞骸今春乃得卷懷衣冠雜襲麋鹿惟茲影響昧昧
自頃一別每於山間仰故人於雲漢之表揭日之名日
起排霄之步日遐未嘗不為之喜而不昧也茲審暫違
鵷鷺之行自詭股肱之郡一麾出守千騎東來恭惟慶
愜其不量墊人之疎賤妄有白事同郡名士糾曹戴從
政重熙妙齡收科一再試吏其文詞清駛奔逸源流出
於東坡而得其髓長書大篇百千言益出而益無窮愈
讀而愈有味今親逢岷江之文伯而為之東道主故應

坐上一見而察其小異不待外人拈出而後知其為道
側之遺寶也敢望未及下車而即取一人焉拔其尤特
揆一上半年京秩之章以列於公車則黃金之臺隗始
之舉古人復生何以代此且薦士本意古者惟其賢而
已今則不然不惟其賢而惟其勢一洗今之俗而返之
古不在吾契丈而誰在也進越之辜不敢自宥敢自歸
於司敗也黥歛山水之邦異時名公作牧者累累焉某
在江東日嘗一過之以使事有指不敢入郛至今遺恨

紫陽諸峰皆與知之今以告訴於使君之天其肯與我酌尊中之醪問諸峰之神而一笑乎久不拂塵從談下筆云云如旋盤之落屑不自覺其煩且瀆也雲泥相懸眇然無合并之期不勝大願願言迺玉是身以柱吾國家即還從上雍

與韓運使

某惶恐死罪僭有白事頃者一介行李五朶祥雲照臨之日比其返也因之奏記蓋嘗進越以徽州錄叅戴從

事重熙為不滿篋櫝之薦貴人多忘楚人冷書不蒙抵
擲以否敢再以請今歲下半年金臺京秩之章可得而
下拜否竊知高風卓絕不搖於熱書而每喜於冷書是
以恃此而無恐不然何罪之敢追

誠齋集卷一百七

欽定四庫全書薈要卷一萬五千六百八十五

集部

誠齋集卷一百八

宋 楊萬里 撰

尺牘

答王樞使

某伏自春時張糾之官因之奏記今月十一日臨江材
官持報以來天落雲錦以驚以喜端冕朝堂之容坐
鎮雅俗之節凜然在人目中也即辰黃花節過風露清

峻恭惟觀使觀文樞使相公剛晦忠君江湖存闕自天
隕祉鈞候動止萬福某老病餘生待盡環堵自丙辰乞
骸露章三請竢命四年逮今歲春夏之交始蒙聖恩
察其非矯偽者放牛縱鶴以遂物性惟是異數過優增
秩一階進職四等控免弗獲僂受震兢揆厥所元微我
天上知己挈攜振德不遺餘力曷濟登茲千江隔而萬
山阻未克抒謝先辱慶語仲尼一字之袞劉公十部之
賢堊人拜此榮光赫然下燭部屋上衝斗牛矣未占避

席之侍願言愛重即還虛左之位式是萬邦

答朱侍講

某九月十月之交於甘道士曾無疑許連得報教二書
幽憂滿懷風濯雪釋即辰首冬殊溫恭惟致政侍講殿
撰尊契文懸車里門天相台候動止萬福玉嫵尊穉均
慶某老身幸安隱黃能臺駘輩察其納祿不官鶩股無
可割者不蒙見崇而今歲秋熟不照年例特地助祝融
為虐坐甑烝灼怏怏無奈先之以疢申之以河魚蓋兩

月而後已得書云股肱之疾移及腹心且艱於憑烏皮
呻青竹是在醫法顧不察耳藏神不曰孰使我饑渴之
不恤者非書乎孰使我劇目鉢心搯擢胃腎者非書耶
某婁陳囊研檮筆之方而以水投石諗以酷嗜在此第
恨病而力不足耳政使和緩復生能浣此學古之胸而
矻此土炭之嗜耶諷及啓棘賓商之義即問於益公益
公報以二說今錄在別紙以聞所著楚辭解甚竒可得
而窺見否獻方之未既而又縱史之又似李公擇戒東

坡勿作詩而反送墨也一笑願言珍重用永糜壽

與湖南安撫趙郎中

某伏以元煒和平執權司冬即辰恭惟判府安撫華文
郎中制閩雄深連帥崇崛一面攸寄三神所禧台候動
止萬福某敬拜手奏記潭府之中涓仰惟財幸某竊惟
近時岳牧之繁雄如金陵六朝之故國長沙定王之古
城居上流控形勝其責任均也二邦大帥異時一二大
丞相之閔勞鼎鉉息肩戟纛者於是乎居焉其不輕而

重明也華文郎中以兩京政駿之儒先間平之德望為

皇朝天潢懿派之賢且文實繼一二鉅公之殊轍今修

於庭戶之間而人自得於湖山之外作一長城當十萬

兵一何韙哉至於賦詩以叱開衡山之雲命騷以彈壓

洞庭之波此又其陶鑄之土直云耳紅塵一騎紫橐兩

禁日斯邁月斯征某也尚竊遲之退惟老病之身已垂

車以示子孫矣天不作緣有如執事一世之名勝如朝

陽之光在物久矣而某居覆盆之下乃不得快睹青天

白日之清明茲非命也夫然乘化歸盡偶未先朝露之間猶得九頓首徹姓名寫慕用以聞焉抑持以自賀云某惶恐再拜敬問台閣玉嫵恭惟即日冬寒尊穉介福川增山委有廬陵之役承命是荷某惶恐白事中男承務郎監衡州安仁縣稅務次公筮仕云初百事牆面天假之福得仰事禮樂詩書之元帥慶雲之惠不別荆棘厦屋之燾必免震凌仲尼不云乎吾舍魯何適矣惟仁人照臨之

與周丞相賀冬

某惶恐今茲歲在鶉火之律月旅黃鍾日臨長至惟皇
上帝萌陽氣長君子是用錫純嘏介眉壽於我丞相于
時賀賓載集壽筭斯舉而下客某也為賈獨後譚子不
至非罪歟不腆春酒有十其壘敢效楚人芥子之誠奉
上一觴千歲之壽仰惟鈞慈不賜麾去有萬其幸屬者
次公辭行之官仰蒙一再宴集父子迭主致曲示恩又
賜之以帥漕薦禰之書至矣盡矣盡室銜載抑又聞新

作樓觀排霄拂日如元龍之百尺東坡之十丈皆奄有
之一何壯也幼與次公之歸皆能言釣誨云將與某樂
之宿昔傳聞豈若身見之何榮也亦既沐浴戒行李以
須皮冠之既迺前月二十有六日疇昔歸塗之疾驟作
委頓僵臥日惟恃粥如麴生臥沙薄持牢九之輩皆絕
交矣寸步非杖不履陳三詩云人言寒士莫作事鬼奪
客偷天破碎茲游不遂茲命也耶呻吟成聲因得唐律
三章敬以獻焉以佐工師抗梁之驩以代燕雀臆對之

賀以贖病夫衡命之誓併以聞焉仰惟財幸

答周監丞

某伏以一雪應期三時有望即辰恭惟致政提舉監丞
鄉丈獨立萬象之表高並兩原之峰春祺鼎來眉壽川
至台候動止萬福某已脩獻歲之慶茲辱行李之臨親
染銀鈎鐵畫之法書朗誦玉佩瑤琚之雋語足華其老
亦孔之榮至於餽節之慇懃粲然為儀之溫厚紋魚異
品而雙止良醞盈尊而四之右彭蠡而左洞庭忽登瑤

組滴真珠而濃琥珀快吸山杯拜嘉載欣推謝無斃仰
惟台察

與江東韓運使

某幽屏山間與縉紳東西行者略不相遭仰止繁星之
芒寒寸心深切欲寄雙魚之白錦其道亾繇疑神載馳
與江水日夜而東下也即辰一雪知時歲律道止恭惟
都運華文丈玉節山立霜威風生天人具依台候動止
萬福某老病日侵挂冠得請上恩優異孤迹歸全微台

座及晉之波曷濟登茲感極幸極繡衣持斧觀省民風
聖主仁厚之澤沛然覃于畊桑壟畝之上乳獨幽枉之
情滂然徹于黠曠玉藻之下使事有指盍歸春風玉笋
之班用宏厥施山林荳人蓋日望之某皇恐白事頃因
便風嘗進越以徽州錄叅戴從政重熙為篋擯不滿之
薦恭承台翰報之以今歲下半年與來歲上半年京削
皆有前議矣仰測台意蓋已心許而化筆未及也寒士
得此何福如焉乃知貴人多忘閒人言輕之說未易可

以測滄溟之斗升度高高之尋丈也敢復僭懇欲乞台
慈特輟來歲下半年一京削以收錄之不勝大願某亦
嘗薦之於徽守任丈任丈已發來年上半年破白之章
矣併祈台察再三之瀆無所逃刑仰惟矜恕未叅拜問
願言珍重即膺賜環之寵

答徐叅議

某伏以即辰景迫週年天欲再雪恭惟致政叅議直閣
年丈高蹈物表獨樂事外天棊名勝台候動止萬福某

老病日侵推墮已甚所謂祇見有不如不見有所超者
退之此詩似端為儂發也年丈官簿年齡尚能記憶當
未及古稀之數恭聞挂冠神虎懸車里門無乃太蚤儒
榮之堂干青霄而直上絲綸之誥揭雲漢而下飾斐然
之詩何異蟋蟀之鳴蟲飛之聲授簡所臨不容九頓首
而辭避已犯不韙茲蒙伐石深刻架軸裝潢不曰以玉
攢而裛燕石以繡段而藉魚目乎寄似碑本榮不蓋媿
也未占侍見願言珍重以輅加璧裏輪之徵

答胡上舍

其久別得誨帖恍若覲玉樹風前之標何如其喜也示
教程試草卷疾展快靚轉圜石於千仞之溪不足為其
清駛也敬留錄本以矜式兒輩而歸草卷切幸收至願
更楸其耘以斂其豐即看冠冕多士之捷親鄙與有榮
云

答周丞相

某伏以即辰雪後方寒恭惟致政少傅大觀文左丞相

國公潭居府中鈞轉天上春回維斗星見老人鈞候動
止萬福某魚釣棄物不自意得幸於今日之公旦灑玉
字墜琚詞餽節物講歲禮有若均網馮之為者整黃冠
整服手三盃首九頓而後降拜敬受焉別占蕪語以謝
嘉惠茲復重陳

答斛通判

某屬者兒輩之官因之奏記材官戾止墮以錦書如渴
得泉喜可知也即辰欲雪不雪入春未春恭惟府判太

中鄉丈釋彼喧煩歸我風月旌旄尚溼山嶽用光天相
台候動止萬福玉婁咸慶某老矣何思何慮獨念兒輩
未免隨牒餬口四方而次公愚騃未更事思抵官刑為
老朽羞微我鄉友知己深厚託契惻欵憐之以慶雲之
蔭難乎免矣安得廣廈千萬間少陵是也眼前突兀見
此屋次公以之示及陸丈使君書信已敬受亦復作一
書謝之望願指材官為投達至幸

答贛守張舍人

某伏以歲事履端春寒方峭即辰恭惟判府右史舍人
尊契丈閫制繁雄威惠洽暢賢忠昭格后帝孚休台候
動止萬福某巖壑無適俗韻晚綴千官雲片之末
行獨得徧交海內之名勝時則有若舍人文英峙超詣
欲論卓詭瓌詞清鏘見之使人自失聽之使人忘罷誦
之使人驚悸古作之絕唱退之所謂惟吾崔君一人者
非某心服此言奚為至於前哉一別十五年高山仰止
之詩夢亦不忘也某自壬子之秋棄官還山丙辰之夏

上章乞骸四年三請去夏始蒙上恩聽請放鶴出籠縱

魚入海方覺吾身之屬我也契丈赴鎮剩欲候紫氣之

東來遮朱幡而一見既而聞之已望行塵而不及矣蓋

邨居阻深去城逾遠故也不謂燒襖未暖絺袍益篤裂

下一封之雲錦倒傾十斛之領珠快閣新篇把玩初驚

而兵廚名酒未斟先醉不覺頭白眼暗之再明寒窓凍

壁之春溫也側聆與人之誦露冕曾未朞月而仁行如

春威行如秋寓精敏於裕和而振寬平於峻整儒者之

政故應有此類非俗吏所能為者不在此其將焉在甚
盛甚賀其解褐初學作吏之日嘗充員是邦之民掇崆
峒之曉日貢水之秋風今故無恙乎今得一代之勝流
以為東道主寵光江山瀟拂泉石真不孤矣天意欲雪
清旭寒甚炙硯呵手作故人書其始夏夏忽焉混混也
安得再見縱談忘塵尾之落飯送飛鴻而揮絃以續疇
昔之樂耶願言迺玉不貲之身式拄斯文之任即還兩
地以均宏之

答周丞相

某下稷恭承訓告降拜披讀驚喜不勝墊渡斷橋非寇
平叔訪魏野之便中路破店亦非宰周公會許男之所
蓋嘗以聞矣而未蒙領之今得銀鈞而後操心不危慰
甚幸甚芍藥枯且盡矣且屬有叔母之戚亦不敢銜花
以獻也新將戾止即圖一小出巖石之瞻伊適預以躍
如

答徽州知府任寺丞

某伏以即辰春服既成既暄既穆恭惟判府寺丞尊契

丈惠化允洽民咏其仁天棐其忠台候動止萬福某老

病侵加乘化歸盡無秋毫可對天上故人談者侍側渺

無前期不勝大願願言迺玉是身式柱斯文延竚旦旦

上雍之從某伏自頃來千騎居頭之初寄牋南風以寫

鬱陶之思以慶人生之貴辱報之之寵問之之多上談

宿昔論詩之驩下及生死一訪之盟何如其懌又何如

其感也樂職宣布亦既許日撫字勞心平易近民類非

俗吏所能為者下轉上聞故當不少矣表選之好音應
有隕自天矣堊人聞之獨後何也戒命先正文集序引
命代文將要必得無價手如夢得乃可序柳文如東坡
乃可序歐集不應下屬之某也抑管蒯代匱漿飲承乏
乎欲承命授簡則不揜靦面欲再拜避席則有負交情
牽率下筆以塞下教之辱別紙呈似

某惶恐晉越再拜敬問契家台媿即日春熙恭惟尊尊
幼幼受祉山則頌貺蠲紙筆墨皆書圍絕品而下拜敬

賦山谷去騷畫虎之篇以謝嘉惠云某頃者僭以鄉友
戴糾重熙薦諸篋擯不滿之處仰辱大人不以為疑未
及下車而論薦之以京秩奏豈戴君受此恩實某受此
恩不翅也

答棗陽虞軍使

某老病僵臥蝸牛廬中濫瀕之波久矣沈鱗雪山之風
亦不到面懷我故人於千遮萬隔之外豈不欲寄一字
寫九回厥路何由子淵之便了朝來剝啄荆扉踏破苔

徑三書朋至七字偕來披讀醒心清骨奚翅痊頭風也
即辰暮春暄淑恭惟知能軍使提宮直閣恩契丈金湯
一障華裔救寧民詠天迪台候動止萬福命戒益公書
專僕登時馳達令待報也李江州無半面已轉干俞漕
一書或檄亦以書繳來教及事目付便介持往漕司投
之又未知俞丈肯從欲否便介必能言其詳也先雍國
先生銘詩祇俟行狀至即為落筆未見願言珍重即協
必復其始之祥

答韓運使

某伏以即日四月維夏氣猶清和恭惟都運徽猷文流
馬勲崇擊隼威肅民二其天神百其相台候動止萬福
某黃帽青鞋乘化歸盡瑤林瓊樹清蔭焉依空有隔千
里共明月之寄懷豈若開青雲睹白雉之為快上言加
餐飯下言長相思使事有指遂歸帝所以從上雍惟日
望之

某疇昔之夜青燈作花破窓既晨乾鵲饒舌私自驚怪

一寒如此槁木冷灰誰復以春風淑之以東溫燠之者
竊笑未既而江東之雲墮我林磴秦淮之月入我懷袖
矣字字煙霏而霧結語語金春而玉應此其為賜固已
百結綠而千懸黎矣而况蚨蜊之羅水紋之穀雲機之
紗以換其獨速之短蓑五臺之花魚麗之鯨東海之碧
鱗以洗其藜蒐之枯腸乎九頓首以謝嘉惠猿鶴亦為
之呼舞泉石亦為之焜耀也錢行之章蕪拙可供一莞
乃蒙蒼石深刻濃墨塗澤花綺緣飾覽之駭歎悚思媿

汗永詒作者之嗤點耳

某芻蕘之謝謹列它槩茲不累繭恭審都運徽猷策冰
解漕下之勲膺日邊除書之寵裕陵聖作呈翻漢回徽
閣華榱雲興霞蔚自非名勝莫寓直廬綬紫魚金蕃錫
亟拜恭惟慶愜某聞之也後賀已云遲惟茲孤懷戴欣
靡已戴糾書兩辱賜報殊為執事之勤薦紙有限求者
何窮亦安能周及也戴君荷稱將感已不淺矣

答建昌陳知府

某伏以即辰玄扈有鳴赤煒於赫恭惟判府大中外庸
告成為裝入覲天人送喜台候動止萬福某老身幽屏
何從得一望見玉山瑀樹之餘映願省厥網馮對越旒
宸敬賦卿月昇金掌之詩以竢履成之賀

某存辱遣騎墜賜誨函折屐走趨盥手披讀情誼獨至
感喜不勝惟茲良牧刻印昭代大樂之書發金匱石室
之祕以備陳農之旁搜而答賓牟之大問顧下取於哇
俚之蕪詞以邁諸篇末不曰以聚薦錦以韋先璧乎頌

以墨本不覺汗浹背也推謝不莊仰惟財幸

答贛州張舍人

某伏以卽辰南風之薰時雨旣降恭惟判府右史舍人
尊契丈五月報政千里生春風謠式和情載咸若台候
動止萬福某老病餘生自放於山顛水涯之外麋鹿之
與處鷗鷺之與渚逢者不識過者不問而我天上故人
獨回朝陽之暉揭五緯之芒每委照衰朽於覆盆鄙屋
之下親戚李簿之歸道暄涼問無恙外手把一封書如

天落雲錦也正冠九頓首盥手三復正退之所謂麗日
寒光之映骨子厚所謂垂露清風之入懷一日而兩得
之其榮且感宜如何也諏及易書此意尤厚蓋毫者無
營癢者無俚則聊復呻搞簡緒蠹篋且以永日且以遣
心而已尚不足為京房焦贛之奴婢而况王輔嗣之精
微程伊川之至到亦何能窺其藩而闖其戶哉八八之
卦亦未終篇未經窺定何急於出而徼於傳也太史公
曰死之日是非乃定伊川先生易傳已成而身前尚未

出也而況於某乎晦菴先生亦嘗問及嘗以家人一卦

呈之今亦呈似一本也苦李何必多啖啖其一恐咀之

未竟而擲棄道旁矣李簿云張先生詩傳已脫藁成書

矣竈鼎之側儻可染子公之指乎其皇恐借稟陳幹章

絕識偉器文學卓越未冠擢第籍甚厥聲數年前為尉

安福貧到骨而益廉去已久而見思然孤寒無媒蹉跎

二十年矣今幸遭一代之正人莊士儒宗文師一顧賞

音便價十倍敢以薦諸篋積未滿之處望特輟今歲上

半年一京削以為之破白先生一唱羣賢畢和矣知眷
是恃故敢於言獨冷無挾故可以言仰惟財幸李簿荷
國士之遇非但廣廈之庇而已一衣帶水未有望見玉
山瓊樹之期願言省厥網馮式如金玉即還上雍之從
以主吾道之夏盟

與興隆府張尚書

某伏以即辰仲夏之月南風之薰恭惟判府安撫華學
尚書帥閩繁雄德威洽暢芒寒翼軫氣淑湖山三神致

祥台候動止萬福某漁釣一壑麋鹿同羣何幸蒙祿於
仲尼覆燾之天獨恨未拜於韋伯星辰之履不勝大願
願言式玉啟處愛護即宅釣樞用宏其施

某深惟大江以南督府犬牙而洪都雄峙不作第二唐
屬之帝子而中興之初屬之大丞相李公不以其上流
一都會故耶時則有若華學尚書厥今高文絕學之英
本朝鉅人長德之首瑞一世而福天下粹乎如不鷲之
鳳不觸之麀未嘗朋一善人而善人怙焉未嘗仇一匪

人而匪人思焉是非有不私之仁不粟之嚴裏充而表
自孚心化而目不運如古之所謂德人者曷濟登茲今
皇上因其勇退之不可留而屬之以上流其不輕而重
也昭昭矣而某也不意老退之身乃得受一廛為氓何
如其喜也然父老扶杖而往觀兒童騎竹而驩迎某獨
不得從其後又何如其恨也泚筆奏記蓋前以為一路
賀而後以致一己之私云仰惟財幸

某惶恐頓首再拜僭問容駟之門潭居之府德星之聚

蘭王之媵尊尊幼幼即日清暑恭惟善祥叢委山則川
增某皇恐輒及其私大兒長孺愚騃無似徼邑南昌適
有天幸遭戟纛肇建之日首得拄笏拜庭以趨走仰事
五雲三台之末光敢乞廣廈千萬間之大庇不勝懇切
之至某塵忝正出令兄安國舍人榜末亦嘗婁參拜蒙
顧盼則此兒亦或者獨在門闌子姪之後塵乎及此則
僭矣惟夫子忠恕焉

與興隆府趙參議

某伏以卯辰昌歆踰節安榴薦芳恭惟叅議提刑少監
先生高議帥閫嘉謀師律后釋憂顧天棊忠賢台候動
止萬福某老病餘生乘化歸盡慶雲在上覆露焉依侍
側云渝嚮風孤往願言綏厥泰宇式如玉金即隨鋒車
遂踐台斗某伏自發軔江介歲在六身嘗走兵人奏記
起敬來年去秋移病上印自此棄官九載請老三章不
惟衣冠束之高閣而已櫛研囊筆不記吾誰姓名羞達
於部家書問諱免於親舊藉第今不自羞諱彼獨不汝

羞汝諱乎乃至於一字亦疎於先生知己至深至厚者
之門此故之以柳子所謂非意也勢也緊我先生妙於
詩文何必減於介軒峻於德望何必減於大資裕於才
識何必減於起部然芒寒色正實大聲闕磊磊在宇宙
間者五六十年顧乃與其一同其蹇而不與其兩同其
亨信矣吾道之艱於逢而善類之永於喟也自今子戶
掾之來每見必得聞靜作暄涼之詳先是羞諱之戒可
以破矣又作遷延之役老病故也今子下筆其布陣甚

似項羽吏道殊精敏而潔已直道玉立竹裂所謂生子當如仲謀者歟敢以為老先生賀

某惶恐再拜敬問師門台媿恭惟即日清暑尊穉咸慶有里中委織悉唯命某惶恐賤懇大兒長孺受知不淺今學為邑於南昌正依仲尼無不覆幬之天百爾誨之庇之所謂我兒即公兒也故知不謁而獲然申申而謁焉仰惟財幸

與運使俞大卿

某伏以即辰玄扈載鳴赤煒有赫恭惟交代都運華文
大卿尊契丈蕩節光華冰漕肅給百吏霜凜萬家春生
三神備釐台候動止萬福契門蘭王之媿尊尊幼幼受
祉山則某伏自春半衝兩江干遮見錦纜牙檣之下風
得一瞻青天白日之清明滿聽登峰造極之談咏盈襟
埃垢冷然一空所謂江漢以濯之秋陽以暴之者歟既
而又蒙書禮舉公讌之盛儀委折俎之腆賜魯之百牢
鄭之九獻何以尚此埜人降拜何如其榮又何如其感

也某抑嘗進越以告學金廣文薦進於門下不崇朝而

提舉之京削如從天落有請必從有謁必獲何如其感

又何如其媿也交代文數月之間榮兼三組任不任而

事不亦叢乎而若漕若帥若憲之政挈領而裘順舉一

而萬從微開物成務之鉅材聽遠燭幽之絕識泛應曲

當之敏手曷濟登茲甚盛甚服然再離鴛行將十霜矣

把江海之一麾駕原隰之四牡外庸有績使事有指動

亦頻矣歲亦淹矣細書夜下甘泉朝陟弘尚竊遲之也

新帥既至文書少省而祥刑尚虛位未能不小勞苦某
皇恐小稟大兒長孺無能不才輒學為邑不寧唯犯五
不韙而已今茲之官如天之福乃得充下走而執鞭為
先驅而負弩仰戴於仲尼覆幬之天密漑於叔度澄清
之陂東坡云我兒即公兒也敢以託翁歸之無私可也
教之誨之俾知為政之方鎮之撫之俾免凌雨之虞吾
舍魯何適矣言之煩瀆而不自知也皇恐皇恐未占侍
側願言省厥網馮式如金玉即從上雍用光吾儒

答太常虞少卿

某伏以即辰仲夏之月南風之薰恭惟判寺奉常少卿
尊契丈玉立頌臺刺經作制聞樂知德天棊忠賢台候
動止萬福某老病餘生乘化歸盡仰天上故人於非煙
倒影之表自是蚊雷隱汙渠醞雞處甕天何敢望分天
章而織雲錦者小兒來歸袖出華星秋月之書玉聯金
勾之軸藥物楮穎之贈若將邱睦媵而禮高年之為者
愆邁之人何以得此於夫子通貴之門也九頓首而三

皈依其何感如之東坡云君如大江日千里我如此水
千山底邈無瞻高明聽清越之期願省厥網馮式如金
玉用對於掌制進讀之拜

某頃寄奉懷之唐律情之所至而形為聲畫者正如苑
柳嘒嘒之蜩草根嚶嚶之蟲耳若繩之以敲金擊石雲
和孤竹之大音則陋且麼矣賡句下逮所謂突過黃初
壓倒元白不啻也回視倡者徒有或百步而後止耳至
於近作一軸如槿花朝暮相催君莫問一邊零落一邊

開如乍開乍闔月穿雲如猶有舊時雙照淚而今不忍
十分圓如木犀天上移來和月種如年來只有賀人書
如問大鈞縱然不得文章力也向連山去作州如夜永
只憐燈是伴秋涼最許簞先知數盡更籌窓送曙起來
贏得鬢成絲如九日年來只有身窮健莫把茱萸浪自
愁如蓬底吟哦詩有味胸中磊砢酒無驩故人莫枉綈
袍意范叔猶能忍一寒如燭短怕更長如敵使方將接
踵至淮民未有息肩期如虎皮皮在有餘威如滿懷冰

雪中秋月過眼鶯花上苑春如一別十年難再逢至莫
為元規扇障風此又珠中之徑寸玉中之連城也和林
正父八句皆竒此尤難者所謂夫子奔軼絕塵而回瞠
乎其後矣侯喜曰弟子伏矣

某惶恐頓首再拜敬問契家蘭王之姪即日清暑恭惟
尊尊幼幼墮祉山則有廬陵委願奉教小兒幼與進拜
既辱先生長者與其進又辱盛禮燕集誨言周諄褒字
舊綯闔宗榮感喋喋何足以謝姪兆之一二

再答虞少卿

某已端拜天落雲錦之書亦既頽頽奏記以謝嘉惠矣
而別紙之誨又特達以先國太美擯寔宥之銘詩詭之
於愚情不能文者承命恍駭慄莫敢當竊惟聖主在上
文治翊然慶霄所覆萬物五色一時儒宗文師老於文
學者馨儀鳳師金春球鳴如司馬班范如舒向卿雲如
韓之日光玉潔如柳之芒寒色正如本朝之歐蘇曾王
者磊磊相望契文渡銀漢歷咸池而不酌顧乃過潢汙

行潦牛蹄皆井而軒焉何也契愛不淺命戒甚榮又不
容趨風以避掩耳而走閔免授簡以塞盛意敬書丹封
以呈似悚仄悚仄

誠齋集卷一百八

謹案卷一百七第六頁前四行商瑚夏璉之器原
本夏訛周今改


第八頁前五行使得餽于是以餽其口原本餽字
訛作衍食二字今改

卷一百八第五頁前五行薄持牢九之輩按荀氏
列饌傳此持字疑當作夜又按東哲餅賦及段
成式食品此九字當作丸

第十二頁後一行而下拜敬賦山谷去騷畫虎之

篇以謝嘉惠云按去騷畫虎疑訛





總校官庶吉士臣張能照

校對官庶吉士臣陳崇本

謄錄監生臣宣葆光